



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 6

Election osang sangdongdangbo ni jail nung alitsüa akok

Bhutan Chuba Jigme Wangchuk-i Assam sendanger

VOL. XXI NO. 27 (ADOK 27) DIMAPUR KÜPTOKNÜ (SATURDAY) YIMPOKSÜI (NOVEMBER) 04, 2023 ₹ 5.00

## Dimapur Railway Station nung tashiyim agi sen saruba aitsür: DAYO

**Dimapur, November 3, 2023 (TYO):** Dimapur Railway Station nung tashiyim agi sen sarur ka apuba atema Police Commissionerate, Dimapur dang kanga pelaba metetdaksür ta Dimapur Ao Youth Organisation (DAYO)-i ashi.

Nagaland State Agri Marketing Board-i ketdangsüa railways ajanga tsünisenbongtsü abenba atema agency ka nung züngsemtemi Naga Farmers Group (NFG) dang tashiyim agi senn meshiba DAYO-i Eastern Naga Students' Federation (ENSF) den külemi aitsür, ta Media Cell, DAYO-i sangdong ka nung ashi.

Ozüng alema inyaksangshirtemi külem Naga nung nem timtem agütsüba anema DAYO-i ola adoktsü aser telok, CSOs ajak den yaritepa ozüngi memelaba syndicates/

agencies aser monopolies anema raratsü. Item ajanga Naga lanurtemi shishilembaba nung tetsükdaksü ajurur, ta DAYO-isa ashi.

India nung lendong ajak nungi kümzüka ayuba tesemtemji railway station aser aiport tem lir saka Dimapur Railway Station nungbo tashiyim agi sen sarurtemi agencies ama inyaksangshiba angudang kanga aoksar aser security inyakyim ashishiteper. Dimapur Railway Station nung shishilembartem aser passengers kümzüka ayutsü atema security maparen akangshitsüla, ta parnokisa metetdaksü.

Naga loktiliba nungi ozüngi memelaba agencies ajak agientsü atema investigating team dang iba mapa inyaker ajak aputsü mepishir ta DAYO-isa ashi.

## Kohima nung shishilembar ka pur aoba aitsür: KCCI

**Dimapur, November 3, 2023 (TYO):** Kohima Chamber of Commerce & Industry (KCCI) züngsem Anil Choudhary pur aoba khukhua aitsür ta KCCI-i metetdaksüogogo.

Nisung pur aoba inyakyim ta tesempatsüka lir aser loktiliba nung iba mapa meinyaktsüla. Senotsü mechi nung shishilembartem pur

aoba aser amokmerenba kanga bulua inyaker. Anungji iba mapa inyakerem bushitepa oa aputsüla aser aibelenertem ozüng tapet agi merenshitsüla ta KCCI-isa metetdaksü.

KCCI-isa Anil Choudhary chioktsü takhangba agütsüba den Civil Organisations aser public ajanga shishilembartem pusema nungittsü mepishia metetdaksüogogo.

## Manipur police commandos-i tashiyim inyaker

**Imphal, November 3, 2023 (Agencies):** Tengenoupal district kübok Moreh nung Manipur police commandos ajanga tashiyim mapa inyakba atema nisung aika pei talidak toktsür jena ogo ta Manipur nung lisopor teloktemi ashir.

Moreh aser Kuki-Zomi-Hmar nung teimba ser aliba tesemtem nungi Manipur Police commandos agientsü atema Kuki Inpi Manipur (KIM) aser Indigenous Tribal Leaders' Forum (ITLF)-i

Union Home Ministry dang mepishiogogo.

Parnoki Manipur Police commandos melena neutral central forces mapa lemozütsütsü akhanger.

Telungpurtem asütsü ta temulung melemi bilemertemi Sub-Divisional Police Officer (SDPO) Chingtham Anand Kumar khasetba sülen Manipur Police Commandos-i search operation ka tenzük ta KIM aser ITLF-i metetdaksü.

(Maneni tapak 8 nung...)

## NPCC-i Tapi Constituency pur ayongzüker

**Dimapur, November 3, 2023 (TYO):** Nagaland Pradesh Congress Committee (NPCC)-i 43 Tapi Assembly Constituency nung alirtem dang parnok candidate Wanglem Konyak nem vote enoktsütsü mepishia metetdaksüogogo.

"Onok den toktepa candidate ji sorkari teyari agüja nungiter aser pa ama tashi mali saka onoki Assembly nung tangatetba tajung, ochishir aser tebilemstü khuret abenba nübo ka toktepdaksür" ta Communications Department, NPCC sangdong ka nung ashi.

"State sorkar dak election mapang dang saksalemba yimya ka lir aser tan-a parnok saksalemogogo. Parnoki sorkari junga ketdangsüa aru asübo kechiba Tapi constiteuncy nung MP, Minister, Advisor aser MLA ajak mongdaksür" ta parnokisa ashi.

"Tapi Constituency nung alirtemi ashiooktsüba aser ochimashiba politics kanga junga meteta lir ta onoki amanger anungji nür constituency tejakleni aotsü aser renloksü atema vote enokjang" ta NPCC-isa ayongzükerogogo.

## Nagaland nung Amur Falcon Conservation tenzük kum 10 jungogo



**Kohima, November 3, 2023 (TYO):** Nagaland nung alirtemi tsüngküm melenshia senzüba ozütem lendong nungi kümzüka ayutsüla aser alima nung Amur Falcon yimtiba naroküm maneni ayutsüla ta Forest, Environment and Climate Change Commissioner & Secretary Y. Kikheto Sema-i ashi.

Hokolbarnü Principal Chief Conservator of Forest and Head of Forest Force (PCCF & HoFF) nung Nagaland nung Amur Falcon conservation tenzük kum 10 ajungba sentong agidang Kikheto-i iba tayongzüker agütsü.

Kum 10 tejakdang Nagaland-i Amur Falcon kümzüka ayutsü tebilemstü khuret aben. Mapang ka Nagaland nung Amur Falcon kanga shikariba atema tetshia liasü saka 2013 kum Department, Pangti, Sungro Village Councils, arogotem, Wildlife Trust of India ajanga 'zero hunting' sangdong, ta pai ashi.

"Nagaland nung Amur Falcon wazüka ayuba ya linük aser alima jenjang nung meteta aküm aser iba jagi November 6, 2013 nü Falcon Capital of the World ta jaloktsü. Amur Falcon kümzüka ayuba nung NGOs, Arogotem aser department ajanga meranga inyakba atema pelar. Asenoki maneni Nagaland ya Amur Falcon kümzüka ayuba tesem ama lidaktsütsü merangdi" ta Kikheto-isa ashi.

Arogo tenzük Y Nuklu Phom-i Nagaland nung Amur falcon nem lokti meyong aremtem nung Amur Falcon kümzüka ayutsü mapa tenzükba agi pa nem Whitley Award agütsüogogo aser iba dang 'Green Oscar' ta-a ajar ta paisa metetdaksü.

Commissioner & Secretary Kikheto-isa Wildlife Institute of India ajanga adokba "Understanding the Amur Falcon- Their stopover sites in Nagaland

and their migratory Routes for better Conservation Planning" report den Nagaland State Poster of State of India Bird sayatsü.

Iba sentong nung PCCF & HOFF Dharmendra Prakash Dharmendra Prakash-I Director General of Forests and Special Secretary, Ministry of Environment, Forest and Climate Change, Government of India Chandra Prakash Goyal-i yokba osang zünga metetdaksü.

District Forest Officer Wokha, Suman W M Sivacharia kum 10 tashi Amur Falcon conservation otsü tatsüka lemsatet.

Sentong nungsa Principal Chief Conservator of Forests & Chief Wildlife Warden, Vegpal Singh aser Pangti Amur Falcon Landowners Union, Pangti Students' Union, Hazhikhe village, Nagaland Wildlife Biodiversity Conservation teshimtet nübotemi o jembi.

## New Delhi nung Autumn Festival 2023 amonger



Autumn Festival 2023 nung Director General, Ministry of Tourism, Manisha Saxena den Tourism & Higher Education Minister Temjen Imna Along aser tangartem agiba noksa ka angur.

**Dimapur, November 3, 2023 (TYO):** New Delhi nung aliba Nagaland House nung Autumn Festival 2023 tanabuba tenzükogogo.

Iba benjung ya Hornbill Festival 2023 matongdang ayonga amonger aser benjung lapokba sentong nung Director General, Ministry of Tourism, Government of India (GoI),

Manisha Saxena IAS-i tongti tesemdang ka ama shilem agi.

"Hornbill Festival kanga nungtugu kumogogo aser Autumn Festival ajanga Delhi nung alirtemi Nagaland chiyungtsü, aben-süoshi tera meteta akümtsü imlar. Kisama, Nagaland nung Hornbill Festival 2023 nung adentsü ayongzüker" ta Manisha-i ashi.

"India tasazük nung North Eastern state tem 8% lir, nütsung yongsük 4% aser GDP 4% jungnüa lir saka experience nungbo NE ya 100% lir" ta Manisha Saxena-i ashi.

India sorkari November 21 nungi 23, 2023 tashi Shillong nung International Travel Mart ayongzüker, ta laisa ashi.

Laisa Autumn Festival nung exhibition stalls lapoktsü.

Iba sentong nung Tourism and Higher Education Minister Temjen Imna Along aden aser pai benjung indang naklu ken sayatsü.

Autumn Festival ya November 3 aser 4 anogotem amonger aser iba benjung ya Department of Tourism, Government of Nagaland-i Chief Resident Commissioner, Nagaland House, New Delhi den yaritepa ayongzüker.

Anogo ananü benjung ya Ministry of Tourism, Government of India-ia teyari agüja nungiter.

# FAC nung Professor ana den tepila sentong agi



**Dimapur, Yimpoksüi/Nov. 3 (TYO):** Fazl Ali College nung November 3 nü college conference hall nung officer ana den tepila sentong agiogo.

Tepila sentong ya Dr Bendangtemjen, Assoc. Professor, Dept of Geography aser Dr Lanurenla, Assoc. Professor Dept of English ana atema ayongzüka agia liasü. Dr. Bandangtoshi ya Zisaji presidency college, Kiphire Principal aser Dr Lanurenla ya Sao Chang College, Tuensang Principal kümogo.

Tepila sentong nung o jembiba mapang Principal Dr I. Wati Imchen-i ashiba agi, tongshi tongtibang anati college toktsüba sülen college ya taoba mapang ambo masütsü. Paisa, tesayur anati college atema bendanga agüja inyakba aser tejangraba tulu nung sayuba atema tena nem tenüngsang agüja liasü. Dr Bendangtemjen indang jembiba mapang Principal-i pa ya kanga dang anepasa aketba nisung ka, shibai asadangsü mekoki khuret ajak benogo aser pai lenla balala nung college atema bendanga inyakba ajanga pa ya kanga dang tongtibang nisung ka liasü, ta ashi.

Kasa mapang nung Dr

Lanurenla indang jembiba mapang Principal-i ashiba agi, la college nung adenba anogo nungi college jenjang melenshi aser la indang tasa balala aser teyari agütsütsü mulunga aliba ajanga college kanga ajangzüko, ta ashi. Paisa, la lenisüba nung IQAC renloka aoba indang jembiba aser iba atema tenüngsang agüja liasü.

Sentong nung Fazl Ali College Teachers' Association tir-i faculty tenüng nung o jembiba liasü. O jembiba mpang tir-i, kümtem tsüngda officer ana yagi jenjang balala nung shilem balala agia association nem teyari agütsüba atema pelaba lemsatepa liasü.

Geography HOD Dr Tsukjemchila Imchen-i, department tenüng nung jembiba aser ashiba agi, Dr Bendangtemjen ya ajaki kanga dang meimba tesayur, mentor aser lenir ka liasü ta ashi. Laisa, Dr. Lanurenla dak ojembitsü sempet aliba indang lemsatep aser la ya nükla tajung aliba lenir ka ta ashi.

Maneni sentong nung Bendangsenla-ia English department tenüng nung o jembiba liasü. Lai, Dr. Lanurenla ya sempet aika aketba nisung ka aser item rongnung o jembitsü

aser zülutsü ajungba aser nüburtem tenzüksü asoshi bendanga agütsür aliba sempet tajung densema lir ta ashi.

Maneni sentong nung FASCU tenüng nung General Sectary Asensor-i o tatsüka jembiba liasü. O jembiba mapang pai tesayur anaprongla yagi bendanga agüja inyakba tatishitsü tajung sayuogo aser tenapronglai kaketshirtem tebilemba aser parnok tarutsü kanga metsüngreta agizüka liasü, ta ashi. Paisa, tenaprongla ya Nagaland nung aliba kaketshirtem atema timla lir, ta ashi.

Ano sentong nung Dr Bendangtemjen-ia o tatsüka jembiba aser pai sentong tajung ayongzüksüba aser kümtem tsüngda tajangshiba tajungtem ajak asoshi kanga pelaba lemsatepa liasü.

Dr Lanurenla-ia, tepila o jembiba mapang college nung küm 16 tashi inyakba bilemtetshia jembiba aser lai ajangshibatem indang lemsatepa liasü. Laisa, mapanungi anener aliba principal aser tesayurtem dang kanga pelaba lemsatepa liasü.

Iba sentong ya Apokla Steno-i sarasademer tembanga liasü.

# Aluyimertem Agricultural Tour tembangogo

**Dimapur, Yimpoksüi/November 3 (TYO):** Assam Rifles-i ayongzüka Chenloisho yimtsüng nungi aluyimertem Jorhat-i Agricultural Tour ka atema anir aoba November 3 nü tembangogo. Parnok kidangi meyipa aruba agizükba sentong

ka AR-i ayongzüka agia liasü. Chenloiso yimtsüng nungi aluyimer 20 anogo trok tashi tour senzüba mapang parnoki Agriculture University Jorhat, Kaziranga National Park, Assam Rifles Dog Unit aser Jorhat nung local

shishilembadak semdanga liasü. Iba sentong ya Chenloisho yimtsüng Chairman-i tenzüjka liasü.

Aluyimertemi parnok asoshi sentong tajung ayongzüksüba atema Assam Rifles dang kanga pelaba lemsatepa liasü.



**Dimapur, Yimpoksüi/November 3 (TYO):** India nung tongtibang airline kati Nagaland nung Emporium Skills Training Institute Dimapur (ETCPL) nung campus interview ka ayongzüka agiogo. Iba interview nung ajak senteper tetsür candidate 41 Cabin Crew ama shimogo. Iba ya ETCPL asoshi kanga tepelatsü aser takok ka lir kechiyong iba inyakyim ajanga tetsür candidate 41 tashi mapa nguogo, ta Emporium Team, Nagaland-i sangdong ka ajanga metetdaksü.

# Mokokchung DC-i Bailey apu indang metetdaksü

**Dimapur, Yimpoksüi/November 3 (TYO):** Mokokchung Deputy commissioner Thsuvisie Poji-i sangdong ka ajanga, Ungma aser Longsa na tsüngda NH 202 nung

Bailey apu koba yanglushitsü atema senzüsenpong mesüi atatsü asoshi tetuyuba agüja liasü, iba apu ya yanglushizükogo aser gari senzüsenpongtsü akoktsü ta metetdaksüogo.

# T. R. Zeliang-i Select Committee senden ayong

**Dimapur, Yimpoksüi/November 3 (TYO):** Deputy Chief Minister aser Nagaland Municipal Bill, 2023, asadangsü asoshi shimba Select Committee Convenor T. R. Zeliang-i sangdong ka ajanga Committee senden ka November 7 nü 11:00 ako nungi tenzüka Assembly Secretariat kübok Committee hall nung agitsü ta

metetdaksüogo. Iba senden nung Nagaland Municipal (Bill) 2023 dak sendakba nung Select Committee indang draft report adopt asütsü.


Senden nung Committee züngsemtem ajak tamakok maludaktsüi arua shilem agitsü asoshi Deputy Chief Minister-isa mepeshia metetdaksüogo.

# E-Roll Observer-i polling station semdang

**Dimapur, Yimpoksüi/November 3 (TYO):** Tang agia aliba E-Roll, Special Summary Revision dak sendakba nung Commissioner & Secretary aser Kohima district E-Roll Observer K. Libanthung Lotha IAS-i November 3 nü Kohima district kübok Polling

Station tem semdangogo. Polling station tem semdanga aoba mapang Observer-i, Polling Station balala nung BLO aser AERO tem den sensaksema liasü. Pa meina ADC & Electoral Registration Officer, Kohima, Rhosietho Nguori oa liasü.

# 36buba RCK Raising Day mungogo



**Kohima, Yimpoksüi/November 3 (TYO):** 36buba Royal Club Kohima (RCK) Raising Day november 1 nü Riiliezhou, Kohima nung tongti o jembiba liasü.

Mepfhuo-i sentepa aliba lokti ajungshi aser club nung züngsemtem rongnung tejentiba Vituohu Rame-i, züngsemtem dang club omen "service to all" dak ajemdaker club asüngsashitsü ayongzüka liasü.

Club züngsemtem den jembiba mapang Puroh-i, club tenzüka aser AIFF affiliated tournament Royal Gold Cup ayongzüka densema club indang inyakyim tajungtem indang jembiba liasü.

Iba anogomung ya kenten sentong ka agiba sülen tembang kong Dr Nicky Kire, Ex Minister-ia shilem agia liasü.

Paisa, club nung züngsem tasentem dang club noksa tajung maneni tejakdangi bener aotsü atema lenmanngtem bushitsü ayongzüka liasü.

Iba sentong ya Vice President Kepelhutuo Nakhro lenisüba nung agi, Kesao Kesiezie-i Tsüngrem temaotsü meshizüka sarasademba den lokti pela agizükba o jembiba aser Property Secretary Atsuu-i tepela anküp o jembiba liasü. Sentong ya Advisor Thejao Vihienuo-i sarasademer tembanga liasü.

Sentong nungsa Rtd Chief Architech Planning and Development, PWD K Sono

# ANCSU Ketdangpur tasen shimogo

**Dimapur, Yimpoksüi/November 3 (TYO):** All Nagaland College Students' Union (ANCSU) 2023-2025 tenure atema ketdangpurtem shimba sentong November 3 nü NSF conference hall nung agiogo.

Kohima Dr. Kitoshi Zhimo-i ketdangpurtem tasentem atema temaotsü meshizüka sarasademja liasü.

Iba sentong nung taoba ANCSU tir Tsukjem Lkr-i tajungshi o jembiba aser Asst. Pastor Sumi Baptist Church

Team tasenba ya Tenyesinlo Bukh tir sür inyakshangshitsü kong, Kivika Achumi -Vice President, Arhonthung M Lotha - General Secretary, Dzüzüve Swüro - Speaker aser tanga ketdangsür 11 densema lir.

**GOVERNMENT OF NAGALAND  
DIRECTORATE OF INDUSTRIES & COMMERCE  
e.mail:industry.naga@gmail.com, e-fax- : 08468825666  
www.industry.nagaland.gov.in**

List of participants selected for Exhibition cum Sale of Handloom (Textiles)/Handicraft/Food Products at Bamboo Pavilion, Naga Heritage Village, Kisama-Kohima during the Hornbill Festival from 1st to 10th December 2023.

Sl. No	Name of the Participants & Address	Items to be Displayed	No. of stalls allotted
<b>DEPARTMENTS</b>			
1	Police Welfare Society	Handmade works	1
2	Directorate for Under Development Areas Govt. of Nagaland	-	2
3	Directorate of Tourism, Govt. of Nagaland	-	4
4	NKVIB, Government of Nagaland	-	4
5	Office Of The Registrar Of Cooperative Societies. Nagaland, Kohima	-	2
6	Department of Tribal Affairs, Govt. of Nagaland	-	1
7	TRIFED, Guwahati, Government of India	-	1
8	India Post Office, Kohima	-	1
	<b>Total</b>		<b>16</b>
<b>DIMAPUR</b>			
1	M/s Zaben Murry, Dimapur	Jewellery	1
2	M/s Local Decorative, Dimapur	Handicraft	1
3	M/s Creative Hills Craft, Dimapur	Handicraft	1
4	M/s Atula Ngullie, Dimapur	Jewellery	1
5	M/s Chayulila Handloom, SignalAngami, Dimapur,	Jewellery and handicraft	1
6	M/s Wapang Textile, Dimapur,	Textile	1
7	M/s Imlitemsu Ao, PadumPukhuri, Dimapur,	Handicraft	1
8	M/s Rong Mar, Dimapur,	Jewellery	1
9	M/s Lovi Achumi, Tsuipu, Dimapur	Food Product	1
10	M/s Lovitoli, Lovi Twine, Dimapur	Handloom	1
11	M/s Vili Assumi, Eralibill, Dimapur,	Handloom	1
12	M/s Native Beads, Dimapur	Handicrafts and Handloom	1
13	M/s Marmonglia, Weaving Unit Dimapur,	Handloom	1
14	M/s Tarensen Self Help Group, Dimapur	Jewellery and Handloom	1
15	M/s Technutsu, Lengrijan, Dimapur	Pickles	1
16	M/s V.K Lohe & Sons, Toulazouma Village, Dimapur	Handicraft	1
17	M/s Justice for the Poor, Dimapur,	Handicraft and Handloom	1
18	M/s Amenla Handloom and Handicraft, Dimapur	Handloom	1
19	M/s Chuba Wooden Craft, Dimapur	Handicraft	1
20	M/s Craft Council Of Nagaland, Dimapur	Handicraft	1
21	M/s Nagato Wooden Craft, Dimapur	Handicraft	1
22	M/s Aienla Jamir, Dimapur,	Handloom	1
23	M/s Tepenjem Multi Purpose Society, Dimapur	Handicraft and Handloom	1
24	M/s Nagaroots, Dimapur	Handloom and Handicraft	1
25	M/s Tongpangonen Jamir, Dimapur	Handicraft	1
26	M/s Crown, Dimapur	Leather Products	1
27	M/s Kumzukinla, Dimapur	Jewellery and Handicraft	1
28	M/s Vinokali Awomi, Thilixu Village, Dimapur	Handloom and Handicraft	1
29	M/s Mixpick Enterprise, Dimapur	Food Products	1
30	M/s The Banana Co. Dimapur,	Handicraft	1
31	M/s Runway Nagaland, Dimapur	Jewellery	1
32	M/s M. Elpis Duncan, Dimapur	Food product	1
33	M/s Grandpas Pickle, Dimapur	Pickles	1
34	M/s Florence Sangtam & M/s Rachel Sangtam, Dmp	Jewellery and Handloom	1
35	M/s Sentinaro Ozukum, 3 <sup>rd</sup> Mile Dimapur	Textile	1
36	M/s Saucy Joe's, Dimapur,	Food Product	1
37	M/s JOME FOOD PRODUCTS, Dimapur,	Food Product	1
38	M/s H. Kashini, Mishikito Village Dimapur	Handloom	1
39	M/s Stick and Stone, Dimapur	Handicraft	1
40	M/s JK Tribal Enterprise, Dimapur	Handloom	1
41	M/s Elibo Chishi, Dimapur	Handicraft & Handloom	1
<b>KOHIMA</b>			
42	M/s Handloom Centre, Kohima	Handloom	1
43	M/s R.V Silks, Kohima	Silk Product	1
44	M/s Neizelieu Seyie, Kohima,	Handicraft	1
45	M/s Walling Jewellery, Kohima	Jewellery	1
46	M/s Ethical Ventures, Kohima	Handicraft	1
47	M/s Orchid Petal Naga Silk, Kohima	Silk Product	1
48	M/s NNVVTI Emporium Kohima	Handicraft and Handloom	1
49	M/s The Rumbling Spoon, Kohima	Food Products	1
50	M/s Unique Touch, Kohma	Jewellery	1
51	M/s Craft and Development Society, Kohima	Handicraft	1
52	M/s Hill of Hues, Kohima	Jewellery	1
53	M/s Chiset Disong, Kohima	Handloom	1
54	M/s Angami Public Organisation, Kohima-	Handloom	1
55	M/s Meguoneinu, Kohima	Handloom	1
56	M/s Western Angami, Kohima	Handicraft	1
57	M/s Keneithono Mer, Kohima	Handloom	1
58	M/s Ketoriavi Sakhrie, Kohima	Handicraft	1
59	M/s Keneichotole Hibo	Handloom and Jewellery	1
60	M/s Temjeninla & Zuluchila, Kohima	Jewellery	1
61	M/s Khriezobenuo Nihu Kera, Kohima	Handloom	1
62	M/s Kekiisezo Zao, Jakhama Village, Kohima	Handicraft	1
63	M/s Cache Naga, Kohima	Handicraft	1
64	M/s Vaivee Enterprise, Kohima	Food products	1
<b>MOKOKCHUNG</b>			
65	M/s Arju Tsuki Bachel Dormitory, Mokokchung	Handicraft	1
66	M/s Asenla Craft, Mokokchung,	Jewellery	1
67	M/s Bendangsangla, Changtongya, Mokokchung	Handloom and Handicraft	1
68	M/s Milenpong Society, Mokokchung	Handicraft	1
<b>ZUNHEBOTO</b>			
69	M/s Niheho SHG, Zunheboto	Food Product	1
70	M/s Phutoi Jakha, Zunheboto	Handicraft	1
71	M/s Kahuli N, Zunheboto	Handicraft	1
<b>MON</b>			
72	M/s Longshah, Longwa, Mon	Handicrafts	1
73	M/s Wangcha Jewellery, Mon	Handicraft and Jewellery	1
74	M/s NoklemKonyak, Mon	Handicraft	1
<b>PHEK</b>			
75	M/s Menuu Tshuah, NEN Resource Centre, Chizama Village, Phek	Handloom	1
76	M/s Zhoto Craft Unit, Khulazu Basa Village, Phek	Handicraft	1
77	M/s Sekho, Weaving & Handloom Society, Chozuba	Handloom	1
<b>WOKHA</b>			
78	M/s Traditional Corner, Wokha	Handloom and Handicraft	1
79	M/s Taste of Wokha, Wokha	Food Products	1
80	M/s P. Motsuthung Lotha, Wokha	Food Products	1
<b>KIPHIRE</b>			
81	M/s Richel Yeptho, Kiphire	Handloom and Jewellery	1
<b>NUILAND</b>			
82	M/s AlemK. Shikhu, Nuiland	Handicrafts and Jewellery	1
83	M/s, Sunika Enterprise, Nuiland	Herbs and Spices	1
<b>CHUMUKEDIMA</b>			
84	M/s Naga Craft Chumukedima	Handicraft	1
85	M/s Songmao, Chumukedima	Handicraft	1
86	M/s Domenic Wotsa & Brothers, Chumukedima	Handicraft	1
87	M/s Honiili Handicraft & Jewellery, Chumukedima	Handicraft & Jewellery	1
<b>OUTSIDE NAGALAND</b>			
88	M/s Sochihan Luiram, Ukhrul Manipur.	Black Pottery	1
89	M/s Asem, Manipur	Black pottery	1
90	M/s Renu Kaul, Senapati, Manipur	Textiles, Kashmiri Shawls	1
91	M/s Pinashi Dipanka Khataniar, Assam	-	1
92	M/s Sapna, Delhi	Jewellery	1

**N.B :-** All the selected participants should submit their acceptance to this office from the date of this issue till 10th November 2023. After which the stall will be allotted to the waiting list participants.  
For more details contact -7085421067

Sd/-  
(A. Temjen Jamir)  
Director of Industries & Commerce

## Tesem ka nung timtem ajanga ajak mekongshidaktsütsüla: Jaishankar

**Rome, Yimpoksüi/ November 03 (Agencies):** External Affairs Minister, S Jaishankar-i, alima tesem ka nung langka kar atalokra ibaji ajanga tanga tesemtem mekongshidaktsütsüla, ta ashi.

"Tanü linüktemi supply chain junga yanglutsüla, kechiyong coronavirus wara mapang nung asenoki ajangshiba tu joko tanaben matalokdaktsütsüla. Manufacture asüba aser supply asütsüji alima tesem ka nung dang masütsüla, kechiyong iba ama tesem ka nung langka atalokra tanungba tesem ajaki timtem ajurutsü," ta pai ashi.

Rome nung Senate External Affairs and Defence Commission indang Joint Secretary Session nung jembidang External Affairs Minister Jaishankar-i, "Market rongsenkettzung aser democratic linüktem ama asenoki supply chain yanglutsü atema amalitepa inyaktsüla," ta ashi.

Alima nung production unit liromedema alitsüji tongtibang, ta shia Jaishankar-i, "Production centres tali amenoktsü, supply chain tasen yanglutsü aser supply chain tali bendenloktsü atema tayongzükba tulu lir, aser iba atemaji Italy aser India nati longjemer inyaktsüla," ta ashi.

## Election osang sangdongdangbo ni jail nung alitsüa akok: Arvind Kejriwal

**Singrauli, November 03 (Agencies):** Delhi Chief Minister aser Aam Aadmi Party national convener, Arvind Kejriwal-i taruba Madhya Pradesh assembly election nung AAP nem vote agüjang, ta mepishi.

December 3 nü election agiba osang sangdongdangbo pa jail nung alitsüa akok, ajisüaka Delhi aser Punjab na nung nüburtemi AAP dak tamang katetba ama Madhya Pradesh nung aliba nüburtemia party dak tamang katettsü imlar, ta pai ashi.

Waidhan nung road show ka nung jembidang Kejriwal-i, "Delhi aser Punjab na nung nüburtemi AAP nem vote agütsüba ama taruba anogotem nung Madhya Pradesh nung nüburtemi-a kasaji inyaktsü ta ni amanger. Vote azungba anogo nungji ni jail nung alitsü asü tanga tesem kar nung alitsüar ni memetet, ajisüaka ajaki 'Arvind Kejriwal, Singrauli-i aruba ajanga onoki pa nem

European Union den Free Trade Agreement agiba dak sendakba nung Jaishankar-i, "2021 küm nungi tenzüka tezüngzüktep aika agitsü atema asenoki ken o jembia arudar aser tongtibangtaji European Union den agiba Free Trade Agreement ya lir. Tanep-a ni shishilembaba tsütsü minister tem den itemji asadangogo," ta metetdaktsü.

"Onoki yaküm-a European Union den Trade & Technology Council amenokogo. EU indang item ama Councils ana dang lir; ka United States den aser ka India den lir. Atangji nungbo asem lir, kechiyong onoki US den-a kasa council ka tenteta lir. Atangji tanü EU, US aser India-i technology tsütsü amalitepa inyaker, aser ibaji kanga tongtibang ta züngshitsüla," ta paisa shisem.

"Tarutsü nung timtem tensa aika ajurutsü. Tesüiba küm pongu tsüngda COVID-19 ajanga alima rongsenkettzung dang masü saka loktiliba nunga kongshia liasü. Iba wara ajanga tang tashi asüngsashi mesüetba linük aika lir," ta pai ashi.

External Affairs Minister-isa, tang linük aika rongsenkettzung aser sentsüh agi kanga timtemdar, aser Russia-Ukraine rara ajanga ano khuret teimba bendenlokogo, ta ashi.

takok agütsü' ta ashitsüla," ta pai ashi.

Madhya Pradesh nung Singrauli district kübok Waidhan nung ayongzükba roadshow nungji Kejriwal den Punjab Chief Minister Bhagwant Mann-a liasü.

Delhi excise policy ochimashi ken o dak sendakba nung Enforcement Directorate (ED)-i Kejriwal jaoka lir, aser iba dak sendakba nung pai ED dang, pa jaokba notice ji agienang, kechiyong iba ya ozüng alema aser yimtenren tsütsü nungi lir, ta ashi.

Kasa ken o dak sendakba nung taküm April ita nung Central Bureau of Investigation (CBI)-ia Kejriwal jaoka liasü, ajisüaka taküm August 17 nü CBI-i benokba first information report (FIR) nungbo Kejriwal tenüng züngsema mali.

November 17 nü Madhya Pradesh nung assembly election agitsü aser December 3 nü vote zünga election osang sangdongtsü.



November 03, 2023 nü New Delhi nung 'World Food India 2023' tetenzük sentong nung adentem tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 04, 2023

### Opposition maliji to ?

**T**ang Nagaland tatar senden nung amentsüsa tatar kata madoktetyonga Nagaland Pradesh Congress Committee purtemi Mokochung district kübok Alongtaki constituency nung, tangari masü, Nagaland government-i ochimashi mapa inyakbatem tejangja tuteta nübortem nem metetdaksüba jagi government nung alirtemia nübortem terabo akümtsüba anepalu tenzüksü imlar. Iba kasa osangji Nagaland nung ochimashi mapa anema inyaksü atema shimteta aliba Lokayukta purtemia angashir alitsü ta bilemer. Atangji, tangar telok kati nungsen jembitsüba aser tai apuba ajakbo shitak masütsüa akok, anungji bushisüngdangtsüla. Tanü India nung government-i junga inyaka angubaji government maparen nung ochimashi mapa inyakterem anema Enforcement Directorate aser Central Bureau of Investigation purtem yoka bushisüngdangba mapa ka asütsü. Aji oda, asen kidanger Assam nunga mapang mapang shia Vigilance purtemi government nung ketdangsertemi sübokrem agiba puteta apuba asenoki angur. Ajisüaka, Nagaland nungbo ochimashi aser sübokrem agiba puteta apuba osangbo talangka mangashi. Kasaji, ED aser CBI purtemia opposition nung alirtem dang ashi ruling nung alirtemi ochimashi mapa inyakba indang bushisüngdangbabo kangabo mangashir. Linük aser nübortem asoshi tia majung kaji aji asütsü. Tanü asen government, asen party aser asen kinunger mesüra medemer apia nübortem akoksatsüsa ochimashi mapa inyakba tai mapu ser odang toktsüba jagi pei telokbo ajangzüker amai asütsüa akok, ajisüaka aji ajangzüker masü saka laotsü tenzüker asütsü. Aji oda, shitakba lenmang yanglutsü senbo agizüka agi saka lenmangbo meyanglu, yimkong atema ki yanglutsü sen agizüka agi saka meyanglu, ano tarokroksü kaji ambulance alitsü atema senbo agizük saka mali ta süra asenok asoshi alima tatembang kati aruogo ta bilemdi. Naga nunger ya nisungsa asüyonga nisung balaka, anungji ajak ruling nung , opposition kata mali, anungji pei sünütsü süa jangratema aliba mapang lir. Ajisüaka, alima nung ya tazüoker, tajungshir aser tai apur kata mali ser jangratema aliba nisungtemji anogo ishika atema dang asütsü, aji serbo parnok jangratem jagi tebilemstü, takoksa aser tashidakang akümtsü. Aji oda, tang Nagaland nung inyakyimji nübortem asoshi mapa tajung inyaksü senden nung lemtettsü aser lemtetba ama mapa inyaksüji kar nem lezmüksütsü aser mapa metenzük dang sen agizüksü aser ketdangsertem ajak akua lema agitsü aser mapa reprangi yokertemi mapa meinyaki aliyonga 'kanga junga renemogo' ta tezüluba nung kuli agütsütsü. Tanü Nagaland-ji yamaji yanglur. Tiyazü kuli agütsüdi asüyonga mapa kenyongi meinyak ser senbo ajunga agizüka chir 'mapa kanga junga renemogo' ta agütsüba tiyazü kuli dang nungi tulubabo malitsü. Aji oda, kari mapa meinyaksü aser kari mapa meinyak ser inyaker ama sen agizüka agütsütsü aser kari mapaji sen agizükba ama shitak inyakogo ta kuli agütsütsü ta longtepba table, teka aser fileji kwi asütsüar ashitsü makok, saka item table, teka aser file jagi Naga nunger lenmang tamajung nung timtemseta jajadaksür, sensaker chirtem mekoksümonga fee agüja private school nung züngdaksür, len tom nung mozü ki metongtet shiranger südaksür aser pei alidak akaba mozü kidang teyari shitak mengutet ser sentem nung sen apur bendanglen shiranger bener jajadang kimong lumong ajak yokma yoker tesüsa kidangi tasü mang bener arudaksür. Atangji, iba ama taochi aser tebilemdang maka ochimashi mapa inyakba mapatem yabo tebushir maliyonga peisasa Tsüngrem tsüba aser nübor jak repranga anentsüla. Atangji, Nagaland nung ochimashi inyakba ya tanü tasen masü aser Alongtaki nungji dang masü, ajibo kümobang sayur amai dang lir, anungji ano telong kumo dena aneptsüsa Congress teloki danga Assembly tema nungi asüyonga maneni constituency shia tonga tonga oa tasang danga asanga aotsü imlar.

## OLEMSABANG

### Tsüngrem tenzüker aser arogopurtem atema tekümdangtsü

L. Kika Pongener.

*(Yashi adok nungi...)*

Atangji, Tsüngrem tenzüker tema mimchir dang asünungji, tashimait karbo alitsü akok, aser khen-khenbo metokmeria inyaksemsü. Anungji tashimaitba aser metokmeriba kar lira, itemji tashiyim agi masü saka timyim agi metongshitsütsüla. Asenoki tanga lima nung inyakba amaji injang, bomb, nok-nu agi meyrutsü-aka, parnok atala-a, sensamasaba, nungsen jembiba, tashiyim agi inyakba, yamala jagi parnok mulong yirutsür. Ano Tsüngrem tenzüker tenzükerba mapa nung sodi agidang, akok tashi pelaseta yoktsüla, kechiyong Tsüngrem tenzüker mepelai yokra arogo azükaro masütsü. Tsüngrem tenzüker tema, Tsüngremi pa mapa asoshi tenung jateta shimtetba tenzüker ka...ta angateta akümtsüba benshitsüla. Aji oda, Tsüngrem tenzüker tema-ia nuburi akümtsüba, jaklaliro, libaliro, jembishinu yimya aser taküm mapa agi liteta sayutsüla.

Tsüngrem lar/tenzüker ajaki, arogo nung tenzüksü maongka anguba atema, Tsüngrem tenungsanga, ajemalua tila kümer, bendanga agüja tenzüksüla. Tanü laishir aika arogo nung tenzüknua, maongka mangur-a lir. Aji oda, pei tenzükerba arogo agi temulong masüba aser tenuk masüngba kecha meli-i, arogo inyakyim/tsüzüng-ozüng ajak nung tashi angaa anidaktetba/litetba tenzüker ka-ka asütsüla. Tsüngrem tenzüker ajaki pei sasa pei angatettsüla, aser nuburi melaktettsüsa tensa tia angateta tenzüksüla. Arogo nung tenzükerba agi dang, asen kibong/taküm mesur...ta angateta, Tsüngrem tsüngdang aser arogopur tsüngdang sentsüh masütsüsa, tani-tebelem jenti liaka, iba atemaji dang jatet aser tenzüker...ta angateta, item timtem ajakji aremzüka tenzüksüla. Tsüngrem o-i ashir..."Kibubai pei zü agi alizükba arogo mesutsü asoshi, kechi nung Tanela Temeshi-i nenok sannukertem asütsü shimtet, iba santem aser nenok pei taküm asoshi kümdangang" (T.Mapa-20:28). Aji oda, "Kümdangang"...ta ashiba o-ji kanga tetsübuttsü lir...Ashiko mekümdangra khuret tulu asütsü. Ano Tanü arogotem nung, arogopurtemi Tsüngrem lartem nem inyadaksünuba kanga tongtipang kaji...Pulpit nungi sayutsüngiba dang masü, saka kipok shiai yia, pei san kwika lir (?)...Item san ajakji tenung-teta metettsüla. Anungji Pulpit nungi sayutsüngiba dang masü, saka kipoksemji kanga tongtipang...ta angateta, pei san tanak-temesung mesadangi bushitsüla.

Ano arogopurtemi angatettsüba kanga tongtipang kaji, Khristar arogo timtemdaksütsüsa, na aser ni sentong atonger ka masütsüla, aser tamajung nung nubur ajungmesor/ayongdener ka masütsüla. Aji oda, arogo inyakyim ajakbo aseni aginuba ama masütsü, mesura aseni bilemba ajakbo mataloktsü sudi, kechiyong arogoji asen nija/kija meyong masü arok meyong lir. Anungji asenok Khristar arogo nung yangluloker ka-ka asütsüla. Ajisuaka arogo timtemdaksür aser arogo anema jembir aser inyaker ka masütsüla. Atangji, shibai Khristar arogo timtemdaksür... Pa/labo Tsüngrem tsüngdang khuret tulu asütsü.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Ezekiel-i shinba atalok tenzüker asütsüa akok: Joel Rosenberg



Joel Rosenberg

**November 03, 2023:** 'Israeli citizen and End Times' kaket zulusang, Joel Rosenberg-i, tang Israel aser Middle East nung rara ya Laishiba nung Ezekiel ainkari shin-a aliba 'Gog aser Magog' indang tetenzüker asütsüa akok, ajisüaka Khristantemi iba dak sendakba telemtetba magitsüla, ta ashi.

Interview ka nung jembidang All Israel News nung yimobilem zülur aser kaketzülur, Rosenberg-i, tang Israel aser Middle East nung rara ya Laishiba nung Ezekiel tapu 37 aser 38 nung shinzüka aliba mapang tetenzüker asütsüa akok, ta ashi.

Ezekiel 38:2 nung "Magog" lima nungi "Gog"-i Israel amaksü indang shia lir.

Paisa, Israel nung rara ajanga tensa ana bener arutsütsüa akok; mezüngbuba nung Israel-i Hamas aser tsükchirtem tamakok ngudaktsür, aser ibaji ajanga region nung tesünep mapang ka tenzüker, ta ashi.

"Tongbang raraba süngjamba sülen ajungbena region nung tashi tulutiba aliba linükji Israel akümer. Ajungbena amokmeren aliba linüktem aser tsükchirtemi tamakok angur aser parnoki kecha mesüteti akümer, aser region nung ajaki tashi tulutiba linük, Israel den yimjung yangluner," ta Rosenberg-i ashi.

Iba ama tatalokbatem indangji Ezekiel tapu 37 tatemangbuba tekongtem nung shia lir, kong Israel-i mapa talangka meraratsü. Iba mapangji Gog aser Magog jakdang asütsü, aser iba mapang nungji Israel kanga azükarua tiptema alitsü, ta pai ashi.

Ajisüaka iba ama yimjung aliba mapangji October 7 nü tembanger; tetezü Ezekiel 37 nung shia aliba ama Israel-i tangar den merarai aliba mapangji süiadokogo, ta pai ashi.

Yimjung mapang nungji Abraham Accords tezüngzüktep agiba-a densema lir, ta pai ashi.

"Tanabubaji- Gog aser

Magog tetenzük mapang ka nung asenok lir. Ni iba ya tang tatalokbatem ajanga ashir masü. Ibayongji ni television nung reprangertem, radio mesüra internet ajanga repranger ajak dang ya ashir-Asenoki Ezekiel 38 aser 39 nung shia aliba ajangshidar ta ni ashir masü. Ajisüaka yamajika asü nunga, iba tetezüji kechi?" ta pai ashi.

Rosenberg den tangar aikati Laishiba nung shia aliba "Gog" ya Russia lenir aser "Magog" ya Russia nungeri aniba sepaitem asütsüa akok, ta bilemer.

"Tanabuba nungji Iran-i Russia dang rara nung adentsü ajungshir. (Russia lenirji) temenen nung kanga tsüka lir, ibayongji Tsüngremi sayatenya nung obendang sayutsü. Ajisüaka Pai Gog-i shilem maginüba rara nungji dendaktsütsü, aser ibaji ajanga Gog aser Magog atema tatemang aruogo ta sayutsü," ta Rosenberg-i ashi.

Ajisüaka Rosenberg-i, "Tang asenok koba tensa ka nung lirar ni memetet. Tang tensa ya ashitsü makok. Ajisüaka tang tensa ya shin o nung shia aliba amai lir. Asenoki telemtetba magidang

kanga shisadanga alitsüla, kechiyong asenok tai süra asenoki Kibuba tenung menüktsütsü," ta paisa metetdaksü.

Taoba ita Israel aser Gaza na tsüngda rara tenzüka sülen anogo ishika dang lirbo Joel Rosenberg-i, Israel aser Gaza tsüngda raraba ya Laishiba nung Tenüngsang Ken Tapu 83 nung shia lir; iba Lai ya küm meyrjang aika tejaklen züluba lir, ta metetdakja liasü.

Rosenberg-i, "Tenüngsang Ken tapu 83 nung Tsüngrem indang shia lir aser tsükchirtemi Tsüngremer nüburtem (Israel) anema tasa tamajung yangluba indang shia lir. Tekong 4 nung tsükchirtemi, 'Arung, asenoki parnok linük ka ama samadaktsüdi aser Israel nungja ya joko meblemtekdaktsüdi,' ta shia lir," ta metetdaksü.

"T. Ken 83 tekong 6 nungi 8 tashi nung Israel atema tsükchir balalai Israel aser Yihuda nunger anemba indang shia lir. Item Lai tekong nung Edom, Ishmaelites, Moab, Hagrites, Gebal, Ammon, Amalek, Philistia, Tyre aser Assyria indang shia lir. Edom aser Ishmaelites indang sükitem tetezü southern Jordan aser Arabia lir. 'Moab aser Hagrites' ji central aser north Jordan lir. 'Gebal aser Ammon aser Amalek' ji Lebanon, Syria aser Sinai peninsula lir. 'Philistia' tetezü Gaza Strip lir. 'Tyre' nung alirtem tetezü Lebanon lir. 'Assyria-ia parnok den longjemer' - ibaji Syria, Lebanon, aser Iraq lir," ta Rosenberg-i ashi.

Tenüngsang Ken Tapu 83 ya tanü putu nung tapet aser tang tatalokbatem indang asadangtetba lir, ta pai metetdakja liasü.

## ANOGO ABEN TSÜNGREM DEN

## Tsüngrem Anasa Lir

T. Ken 145: 14-21

"Shirnoki Kibuba ajar parnok ajak dang pa anasa lir, atangji nisung shibai ajar ajak dang anasa lir" (t.18). Ibai tenangzükba tulu masü no? Ibai tulu. Iba tenangzükba nung yur nai tanü mapa inyaktsü akok. Asenoki tali angatetsü merangdi.

Mezüngbuba, shirnok metsüdaker parnok anasa Tsüngrem lir. "Shirnok laor ajak Kibubai ajongmesor, aser mechioker alir ajak atsümesor" (t.14). Na metsüdaker alanga alitsü akok. Nai kechi inyaktsüla meinyaki alitsü akok. Na ne mapa nung metsüdaker, aser temulung makai shisabulua alitsü akok. Na temenen nung metsüdaker alitsü akok.

Tanabuba, Khuret abener anasa Tsüngrem lir. Shirnok teblemetsü khuret agi kokroka neneta lir, parnoki Tsüngrem dang jara parnok anasa Tsüngrem lir.

Tasembuba, yaa alir anasa Tsüngrem lir. "Tenük ajaki ne madak ataa alir, aser mapang tetemsü nung nai parnok nem chiyongtsü agütsütsü" (t.15).

Tekong 16 Tsüngrem asoshi sarasadem langzüksü temela ta ashir. "Nai pei teka salar, aser taküm aliba shiai jangraba nai tiptemdaktsür". Tsüngremi inyaktsü ajunga agi Pa teka salar tanü asenok nungdaktem moatsütsü ataa alir. Teblemetsüji aiben asenoki asen temulungjang melapoker aser Pa dang mayimtener.

Pezübuba, shirnoki Tsüngrem dang ajar parnok anasa Pa lir. Asenok iba tenangzükba tulu kar: "shirnoki pa tsübur parnoki jangraba pai ataloktsütsü; Pai ano parnoki ayimtenba angashitsü aser parnok kümzüktsü" (t.19).

Tatamsa shirnoki Tsüngrem meimer parnok anasa pa lir. "shirnoki Pa meimer Kibubai parnok ajak wazüka ayur; saka tamajunger ajak samatsütsü" (t.20). Yakobi sayuba anidakang "Tsüngrem anasai arung aser Pai nenok anasa arutsü" (Yakob 4:8).

Tsüngrem na nungi talangka masü. Nai mezüngbuba mera agitsü, pa dang ayimtentüsü aser ashitsü, "Kibuba, ni na anasai aruner. Ni yangi lir," ta ashitsü Tsüngremi ataa alir. Na metsüdaka lir asü? Na khuret bena lir asü? Mesüra nungdak lir asü? Shirnoki Pa dang ajar parnok anasa pa alitsü pai nangzüka lir.

## VoM-i November 05 nü International Day of Prayer amongtsü

**November 03, 2023:** Taruba Amongnü, November 5 nü Voice of the Martyrs (VOM)-i International Day of Prayer for Persecuted Christians amongtsü; iba anogomong nung parnoki alima tesem balala nung reshikangshi tia nung aliba Khristantem atema sarasademtsütsü.

Voice of the Martyrs ya alima tesem balala nung Khristantem temeden kümzüktsü nükjidong nung tentetba International ministry ka lir.

Küm shia parnoki International Day of Prayer For Persecuted Christians (IDOP) ayongzükba amonger aser taruba Amongnüa iba anogomong amongtsü aser November ita piyong iba dak sendakba sentong agitsü.

VOM indang website nung

yamai shia lir, "Alima nung mission mapa inyaktsü atema tesem tamajungtibatem nung Khrista atema tasü itta kulisüba ajanga reshikangshi ajuruba Khristantem atema sarasademtsütsü asoshi iba anogo ya alakteta shimteter. Alima nung tamangertemi chichia sarasademba ajanga Khrista ajanga dang anguba telongjem sayur. Reshikangshi ajangshiba Khristan kibong nung asenok longjemtsü Tsüngremi asenok ajungmesoang ta sarasademer."

Geopolitical Intelligence Services (GIS) report ajanga ashiba agi, Khristan yimsü amangba ajanga tang alima nung anogo shia Khristan 13 shi tepseter.

Voice of the Martyrs USA nungi Tedd Nettleton-i,

"International Day of Prayer atema Voice of the Martyrs ket nung resource aika lir, aser itemji digital ajanga angutsü. Itemji nenoki ner pastor mesüra fellowship nung lenir den lemsatepang. Nai parnok dang, 'iba sentong ya ayongzükba lir, anungji asen Arogoia shilem agidi' ta shiang," ta metetdaksü.

"Pastor temi Arogo nung züngsemtem dang nungi kanga tongtibang osangtem kanga metetner. Anungji nai ner Arogo nung pastor dang iba sentong (IDOP) ya na atemabo kanga tongtibang ta lemsatepang," ta paisa ayongzük.

Nettleton-isa, "Na Arogo ka nung lenir süra aser nai November 5 atema tanga sentong kar renemer lira nai

November 12 mesüra November 19 anogotem nung iba (IDOP) sentong ayonga agitsü akok. November ita nungsa ner Arogoia alima nung reshikangshi tia nung aliba Khristantem atema sarasademjangma," ta ayongzük.

VOM-isa IDOP anogomong nung YouTube nung film tatsüka lemsatepogo. Iba film ji Buddhist kibong ka nung intetba tebur kati Buddhist monastery ka toktsür ajenba aser Khristan yimsü agizükba otsü lir.

'Sejun' ta asüba feature film reprangba ajanga International Day of Prayer for Persecuted Christians (IDOP) nung shilem agitsü atema aika ajungmesotsü imlar, ta VoM-i metetdaksüogo.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Sayip**

(adj) tiplen, achiji mesüra abelen ( other side of a body, either right or left side)

\* Nisung aikati sayipi mejanger.

**Sayu**

(v) tuyu, angateta ashi , rebrangdaksü (teach, show)

\* Tesayuri noksa sayua lesson sayu.

**OLONG PAITEP # 6685**

1		2				3		4
						5		
6				7				
						8		
		9						
						10		
11				12				13
14			15					
					16			
17								
			18					

**TIPIEN**

1. Tzü atsüngtendak - (8)
5. Jenti - (4)
6. Alu inyak dang amshiba oset ka - (6)
8. Netsü tetsü - (4)
9. Yisu-i iba tzüma nung jaja- (5)
12. Menütsü - (5)
14. Yimti tulu - (4)
16. Arem ak - (6)
17. Te \_ \_ \_ \_ m - (4)
18. Mangatetep adoka rara - (8)

**LANGTSÜNGLEN**

1. Totzü nung aro - (5)
2. Okshia - (6)
3. Khu abenba shiruru - (4)
4. Mozü agi mapet - (5)
7. Aria bilemtep - (7)
10. Purapuji o jembiba - (6)
11. Nguyu - (5)
13. Zülua aliba metettsü merang - (5)
15. Iba sülen - (4)

**OLONG PAITEP # 6654 TELANGZÜBA**

**TIPIEN :**

1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.

**LANGTSÜNGLEN :**


2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.

**NAI-A YA METETTER MA**



'Tree Lobster' ta ser taküm sangnu tuluka lir aser ibaji tulu kümerbo meimchir tetka tulu ta ashir. I ba taküm sangnü yabo Australia lima Lord Howe ta ajaba asetkong nung dang angur. I ba shiruru dang ya 'Dryococelus australis' mesüra 'Lord Howe Island stick insect' taka ajar.

**Noksa nung meputepi aliba 5 bushiang**



**Bhutan Chuba Jigme Wangchuk-i Assam semdang**



LGBI airport, Guwahati nung Assam chief minister Himanta Biswa Sarma-i Bhutan Chuba Jigme Khesar Namgyel Wangchuck pelaa agizükba angur.

**Guwahati, November 3, 2023**

(Agencies): Bhutan Chuba Jigme Khesar Namgyel Wangchuck-i Hokolbarnü Guwahati tonga aruogo aser pai anogo asemnü Assam nung amongtsü.

Assam chief minister Himanta Biswa Sarma, minister Ranoj Pegu, minister Ranjit Kumar Dass aser sorkar ketdangsürtemi Bhutan Chuba Jigme pelashishia agizüka liasü.

Hokolbar anüingdang Druk Air flight ka ajanga Bhutan Chuba,

pa kinungtsü Queen Pema Jetsun, jabaso ana aser temeintem Lokpriya Gopinath Bordoloi International (LGBI) airport nung arua anenzük.

Iba mapang pai Guwahati nung sentong balala nung adentsü aser Kamakhya temple o Kaziranga National Park semdangtsü.

“Guwahati nung taonung yipzükba süen pa Kaziranga-i aotsü. Idakji aonung ka yipzüksü aser Deobarnü Jorhat nungi New Delhi-i apusoa aotsü” ta Bhutan

India Friendship Association vice president Dasho Tsering Wangda-i ashi.

Pai Guwahati nung Kamakhya temple semdangtsü aser Radisson Blu Hotel nung Bhutan nung den ajurutepa sensaksem mapang ka alitsü.

Hokolbar aonung Assam Governor Gulab Chand Kataria-i Chuba Jigme atema dinner ka ayonga agi aser asüngnep Kaziranga National Park-i aotsü.

Assam-i Bhutan den kilometre 267 agi arrtsüa lir aser tesentaktep tajung lir.

Alemli nungi Bhutan aser Assam tsüingda tesentaktep tajung lir aser tesüiba nung Bhuta Chubatem Barpeta Road ajanga Royal Manas National Park semdangisa aruogo.

Bhutan Chuba Jigme Wangchuk-i India nung hopta ka amongdang Prime Minister Narendra Modi, External Affairs Minister S Jaishankar aser Centre sorkar ketdangsür kar den ajuruteptsü.

Assam dak alia Bhutan Chuba-i anir teshimtet teloki Maharashtra semdangtsü.

Bhutan Chuba marudang Assam CM Sarma-i November 1 nü Royal Bhutan Ambassador to Bharat Major General Vetsop Namgyel den ajurutepa liasü.

**Meitei Leepun tanishir Pramot Singh taküm agitsü merang**

**Imphal, November 3, 2023**

(Agencies): Hokolbarnep Imphal west nung nisung anati Meitei Leepun tanishisang taküm agitsü meranga liasü.

Shija Hospital, Langol anasa tenati Meitei Leepun tekolak Mayengbam Pramot Singh amenba gari nung injang trok khaloktsü.

Tanep 7:30 ako meta iba lendong atalok saka Pramot Singh tasüba nungi kümzükogo.

Arishi küm 56 tain Pramot Singh aser pa driver na Langol nung aliba Meitei Leepun Office-i aodang iba lendong ajuru.

Gari ka tesülen tejak meibanger mena aliba nisung anati injang trok khaloktsü ta Meitei

Leepun tanishir Pramot indang driver-i osangbener dang ashi.

Iba osang angashiba sülen Lamphel Police Station nungi police telok ka tesem tonga ao aser ken o ka benok.

Maneni, Manipur Forensic Science nungi telok ka tesem tonga oa injangkü tazüing 6 nguteta bener ogo.

**Moreh arrtsü anasa Myanmar army-i Kuki telungpur 2 khaset**

**Imphal, November 3, 2023**

(Agencies): Manipur kübok Moreh jila nungi jena aoba Kuki telungpur ana Myanmar army-i khasetogo.

Hokolbarnep Namphalong market, Myanmar anasa tena khaset. Iba mapang Myanmar army-i tesem balala nungi Kuki telungpur aika puogo ta intelligence osang ajanga angazüker.

Namphalong ya Moreh gate number two nungi tatsüka dang pilar lir.

2021 nungi Myanmar Army-i

mapang shia People's Defence Force (Myanmar) (PDF) aser Kuki National Army (KNA) (B) den rarayonga arur.

October 31 nü SDPO Moreh (Tengnoupal subdivision) Chintham Anand Kumar khasetba sülen Indian security forces-i mapa balala inyaka aruba ajanga Kuki telungpurtem parnok talidak toktsür jena ao.

Sepaitemi Toulal Village, Laikhot Village, Senjang Village aser Toulal Village nung mita aoba ajanga Kuki telungpurtem

Myanmar leni jena ao.

Kuki nung telungpurtem Sangaing region, Myanmar kübok Khangpat aser T Minou yimtsüngtem nung jenoka lir ta osang ajanga ashi.

Tanü agi anogo anabuba Kuki-Zo nung 150 shi ka Tengnoupal district nung aliba 5 Assam Rifles gate anasa jenoka lir.

Sepaitemi cordon and search operations inyakba atema tetsübu nung parnoki pei talidak toktsür jena aru ta Assam Rifles-i metetdaksü.



November 3, 2023 nü Shillong nung Assam Rifles Inspector General's Conference alidang agiba noksa angur. Iba sentong ya Lieutenant General PC Nair, PVSM, AVSM, YSM, PhD, Director General of Assam Rifles menden ser Headquarters Directorate General Assam Rifles Laitkor, Shillong nung agi aser Headquarters DGAR & Formations nungi Formation Commanders, Battalion Commanders aser Staff Officers aden. (Shillong, November 3)

## Gaza nem teyari agütsütsü atema UN-i USD billion 1.2 bushidar

**Geneva, Yimpoksüi/ November 3 (Agencies):** UN-i Hokolbarnü Gaza aser West Bank nung alir nisung million 2.7 nem teyari agütsütsü atema USD billion 1.2 tenla bendentsü asoshi temepeshiba ka agütsüogo.

"Gaza nung alirtem ajunga aser occupied West Bank nung alir 500,000 densema nisung million 2.7 nem teyari agütsütsü asoshi USD billion 1.2 nüngdaker ta asatetogo," ta Office for the Coordination of Humanitarian Affairs (OCHA)-i ashi.

OCHA-i October 12 nü mezüngbo nisung million 1.3 nem teyari agütsütsü atema USD million 294 nüngdaker ta shir liasü.

"Iba sülen tensa kanga tamajungba kümogo," ta parnok i ashi.

OCHA-i temepeshiba tasen agütsüba ajanga chiyongtsü, tzü, health care, tejenokdak, hygen aser tanga nüngdaktem peritsütsü, ta ashi.

"Onoki tenla agütsürtem dang iba teyari agütsütsü asoshi takaratiba nung tenla agütsütsü mepeshir," ta OCHA-isa shisem.

"Palestine nungertem timtem tajemba kümdaktsütsü atema senotsü peria agütsüba dak keta lir. Nüngdaka alirtem ajak nem parnok kong lidir liaka teyari agütsütsü; humanitarian supplies peria agütsüba aser tongtibangsa totzü kanga nüngdaka lir," ta parnok i ashi.

October 7 nü Hamas puri

Israel amakba sülen rara tenzük aser iba anogo Israel nunger 1,400 dak tema tepseta liasü.

Hamas-i achaayangba Gaza health ministry-i ashiba agi, tang tashi nung Gaza nung nisung 9000 dak tema süogo aser asürtem ya timba tetsür aser tanurtem lir.

Hokolbar anepdangi Israel-i Gaza makogo aser Gaza health ministry-i ashiba agi, Gaza yimti kübok Zeitun nung nisung 15 aser Jabalia refugee camp nung nisung tenet süogo.

Kasa mapang nung Israel military-i ashiba agi, parnok sepaitemi Gaza nung yimti tongtibangtiba meketbangogo. Gaza nung azütokshi anentsü aser ceasefire benoktsü asoshi alima kintemi akhangba mapang ka nung iba osang ya agütsüogo.

Israeli indang military otongdar Daniel Hagari-i Breostibarnü ashiba agi, sepaitemi ground operations tenzükba sülen hopta ka lir Gaza City meketbangogo.

"Israel nunger sepaitemi Gaza yimti meketbangogo, koba Hamas pur indang centre lir," ta Hagari-i osangbenertem dang ashi.

Hagari-isa, ceasefire benoktsü asoshi tangbo kecha tebilemba mali.

Israel Ato Kilonser Benjamin Netanyahu, shibai taoba hopta Hamas den rara tanabuba stage-i iogo ta ashi pai Brehostibar aonung ashiba agi, Israel nunger sepaitem dang rara teyalong

nung lir. "Onoki takok tajung ngua odar aser Gaza yimti temeket adena iogo," ta pai ashi. "Onok tejakdangi odar."

Israel military-i sangdong balaka ajanga social media nung ashiba agi, parnok asoshi tinyaktsü tongtibangtibaji, Hamas puri pur aoba tanur, tetsür aser teburtem meyipa anri arutsü aser Israel kodanga memaktetsüsa Hamas pur samatsütsü asoshi lir.

Hamas indang military wing, Qassam Brigades-i, Gaza ya Israel asoshi puti otsü nung atakadem ka asütsü ta tekümdaktsü metetdaktsüogo aser iba yimti-i aruba Israel nunger sepaitem juli tanak nung meyipa aotsü, ta ashi.

United States tir Joe Biden-i, Hamas puri sota alirtem chiokdaktsütsü atema rara khen atema anena atatsü asoshi ayongzükba mapang ka nung Israel-i iba osang ya sangdongogo.

Iba sülen White House ketdangsürtemi, khenyongi ceasefire benoktsü asoshi Biden administration-i memulunger saka khen atema rara anena atatsü asoshi nongshitsü. Iba mapang teyari agütsütsü aser pua alirtema chiokdaktsütsü.

Brehostibarnü UN special rapporteurs teneti Gaza nung ceasefire atema ayongzükogo. Parnokisa Palestine nunger ajunga samatsü ana nung aliba atema süoki ia bilemba lemsatepogo.

## North Korea-i foreign missions tem shibanger

**Pyongyang, Yimpoksüi/ November 3 (Agencies):** Alima kintemi tenokdangba balala agütsür aliba ajanga bendanglen office tem nem senotsü teyari magütsüteti akümba sülen bendanglen diplomatic missions aika shibanger, ta North Korea-i ashi.

Spain, Hong Kong, Angola aser Uganda nungbo shibangogo aser mongintemi ashiba agi, Pyongyang-i, mission aser embassy 10 shi shibangtsü akok, koba parnok indang diplomatic tesendaktep shilem 20 shi asütsü.

"Alima melenshia aoba aser national foreign policy dak ajemdaker onoki diplomatic mission tem aginba aser amenokba inyakyim tenzükogo," ta North Korea foreign ministry otongdar-i Hokolbarnü sangdong ka ajanga metetdaktsüba den embassy kar shibangtsü aser kar lapoktsü, ta shisem.

Temelenshi ya, bendanger den tesendaktep nung linük tejangraba ajungkettsü atema inyaksangshia aruba nung iba ya-a shilem ka lir, ta otongdar-i ashi.

North Korea ya linük 150 dak tema den diplomatic tesendaktep lir, ta Seoul indang Ministry of Unification-i ashi, ajisüaka embassy aser consulate bo ishika dang lir.

North-i tatembangsa 1990s nung ayawara tesashi adoker aliba mapang foreign mission tem shibanga liasü.

Tanga parnok tebilemstü tulu ka ajangshia aoe ama reprangteter, kechiyong tenokdangba balala agütsü aliba ajanga parnok lenla aika nung senotsü aatsü asoshi mesademi kümogo.

Unification Ministry-i ashiba agi, mission tem shibangba ya North nem tenokdangba tali agütsüba ajanga parnok foreign currency aazükba nung tetsükdaktsü adokba temaitsü ka lir. Tenokdangba agütsü aliba ajanga parnok den kanga junga sendaktep aliba linüktemia sadem sadema inyaksangshi mesüteter.

Korea Institute for National Unification nung senior research fellow Cho Han-bum-i ashiba agi, linük ka asoshi parnok indang diplomatic mission tem shibangtsü atema rongsenketzung nung tetsükdaktsü adokba dak akala tanga kuli agütsütsü tasak asütsü.

"Economy ka achaayangtsü asoshi Cyber hacking kija ya teperi masü. Bendanglen embassy tem shibangba kuli tulutibaji foreign currency ajema akümba aser rongsenketzung nung tetsükdaktsü adokba ajanga lir," ta pai AFP new agency dang ashi.

North Korea rongsenketzung mejungi liasü saka ano COVID-19 wara ajanga arrtsü shibangtsüsa akümba ajanga tamajungba kümogo.

## Iran: Drug rehabilitation center ka nung mi adok; nisung 32 asü



**Tehran, Yimpoksüi/ November 3 (Agencies):** Hokolbarnü Iran anütoktiplen nija drug rehabilitation center ka nung mi adokba sülen nisung 32 süogo, ta Iran state media sangdong ka ajanga metetdaktsü.

State TV-i ashiba agi, iba lendong nung ano nisung 16 yiru aser parnok Langroud nung mozükidangi anirogo. Iba yimti ya linük yimtiba Theran nungi km 200 shi pilar lir.

TV report ajanga ashiba agi, iba centre nung nisung 40 asemer. Hokolbar anepdang mi adokba mapang center nung staff kwi liasü iba indang osang tejangja memetet. Taoba mapang sangdong balala ajanga iba lendong nung nisung 27 asü aser nisung 17 yiru ta sangdonger liasü.

Video ka ajanga iba center nungi milak aser mokozi adokba

sayuogo. Mi ya mapang tatsükalir temsep aser mi kodaser adok iba indang ketdangsrtemi bushisüngdangdar, ta TV report ajangsa metetdaktsü. Iran indang judiciary tekolakba Gholamhossein Mohseni Eje-i ken o kanga junga bushisüngdangtsü tetuyuba agütsüogo.

Iran nung mi lendong atalokba ya tang tasen masü, koba timba safty measures sentoka toktsüba, facility tem kanga tejen akümba aser emergency services inyakyim meshidakba ajanga ataloker.

September ita Iran Defense Ministry indang car battery factory ka nunga mi adoka. Iba factory nung hopta ka majung tsüngda anaben tashi mi adoka liasü. Ajisüaka lendong nung nisung asüba osangbo kecha mali.

**GOVERNMENT OF NAGALAND  
DIRECTORATE OF INDUSTRIES & COMMERCE  
e.mail:industry.naga@gmail.com,e-fax:-08468825666  
www.industry.nagaland.gov.in**

List of participants selected for attending India International Trade Fair at Pragati Maidan at New Delhi from 14th -27th November 2023.

SL No	Name of the Participants & Address	Trade to be Displayed
1	M/s Sarila, Dimapur	Pickles
2	M/s Jennifer Kemp, Nepali Basti, Dimapur	Handloom and knitting
3	M/s Tsalemla, Kiphire	Handloom and Knitting
4	M/s Anakali, Hukai Village	Handloom
5	M/s Apong Phom, Longleng	Basket
6	M/s Asune Pochury, Dimapur-Phone no. 9863145525	Handloom and Jewellery
7	M/s Kedoneino Nakhro, Jotsoma Kohima	Handloom
8	M/s Neihunuo Sorhie, Kohima	Handloom
9	M/s Nchumbeni, Dimapur	Handloom
10	M/s Lily, Mon	Dry Flower and Handicraft
11	M/s Tsungrosangla, Mongsenyimti, Dimapur	Dry Flower
12	M/s Lanukumla, Landmark Dimapur	Food Product
13	M/s Theja Group, Toulazouma village, Dimapur	Decorative items/Dry flowers
14	M/s Alito Kappo, Zhekiye Village, Zunheboto	Handloom
15	M/s Jonjibeni Mozhui, Duncan Bosti Dimapur	Handloom
16	M/s Talitenzuk, Kher Mahal, Dimapur	Dry Flower
17	M/s Asenla Longchar, DC court, Dimapur	Handloom
18	M/s Tensula Walling, Lengrijan, Dimapur	Handloom
19	M/s Punalemla, Mokokchung	Handloom and Handicraft
20	M/s Vesunolu Yoho, Phusachodu, Phek	Handloom
21	M/s Tientetlar Self Help Group, Mokokchung	Handloom and Jewellery
22	M/s Imlirenla, PadumPukhuri, Dimapur	Textiles
23	M/s Ghokheri Choppi, Zunheboto	Handloom
24	M/s Chekro Welfare Association, Dimapur	Handloom

**N.B :-** All the selected participants should submit their acceptance to this office from the date of this issue till 10th November 2023 alongwith 2 passport size photo and Aadhaar card xerox. After which the stall will be allotted to the waiting list participants. For more details contact -7085421067

**Sd/-  
(A. Temjen Jamir)  
Director of Industries & Commerce**

# Telongjem FC teloki MDFA Trophy 2023 marok benogo



Telongjem FC teloki MDFA Trophy takok marok agizüker kelen MDFA lenirtem, ADC Mokokchung Chumlamo Humtsoe aser lenirtem külemi tangokba noksa nung angur.

**Mokokchung, November/ Yimpoksüi 3 (TYO):** Imkongmeren Sports Complex Mokokchung nung Mokokchung District Football Association-i ayongzüka akaba MDFA Trophy 2023 marok Telongjem FC-i benogo.

October 17 nü nungi tenzüka Pool 4 tashi lemsar asayonga arur kelen tanü final Moanungsang MSC aser Telongjem FC tsüngda nikongdang 1:00 Ako nungi tenzüka asaya aser iba asaya nung Telongjem FC teloki goal 2-1 agi Moanungsang MSC kokteta MDFA Trophy marok benogo.

Tanü iba asaya tenzüker kelen telok ana tashi kasa süa mapang talangka asayaa arur kelen minute 41 buba nung Moanungsang MSC telok nungi jersey no 10 Meyasemba-i goal ka idakja par telok takoklen sür anisüngzüka mapang agia liasü.

Anisüngzüka mapang agir kelen mapang talangka dang Moanungsang MSC telokia takoklen sür asayayonga ao aser kelen Telongjem FC puria iba goal-ji küptoktsü meranga asaya saka minute 90 tashi nung Telongjem FC puri iba goal kaji meküpdoktet minute 90 tashi asayar kelen ano talila mapang minute 6 atakzüksü aser iba maongka agiteta minute 91 buba nung Telongjem FC telok nungi jersey no 16 Seiminthong Haokip-i goal ka yoka telok ana kasasa aküm aser ano iba sülen minute 95 buba nung Haokip-isa goal ka yokteta Telongjem FC Teloki goal 2-1 agi Moanungsang FC telok kokteta

taküm MDFA marok benogo. Telongjem FC Teloki taküm MDFA Trophy marok abenba ya süka taküm agi asembenbuba tongkonga takok marok abener. Taküm Telongjem FC teloki takok marok den külemi sen lakh 2 den certificate aser asayar shia jurila medal agizüka liasü.

Tanabuba jenjang ajangzükteter Moanungsang FC telok tanabuba sen Lakh 1 den tanabuba jenjang marok aser asayar shia jurila certificate den jurila medal agizüka liasü.

Mokokchung nung MDFA Trophy tenzüker küm 31 tashi asaya aruba otsü nung asayar telok aser football club balalai asaya aruba nung küm asemsem tongkonga takok marok abenerji Arkong Ward, Snippers aser Telongjem FC ta lir.

MDFA Trophy 2023 nung jurila senpet agizükertem yamai liasü aser parnoki certificate den sen Rs.5000 agizük.

Player of the tournament-Meyasemba-Moanungsang MSC

Best goalkeeper-Nungsangyanger-Super Seniors,

Top scorer- David Konyak-KSUM ,

Promising player Shilusosang- SSS aser

Best defender Tongpangjungshi Jamir Telongjem FC

Tanü MDFA Final asaya nung Chief Match Patron Advisor for Information & Public Relations, Soil & Water Conservation Wb.Imkong L.Imchen-i asaya

metenzükdang sentong tatsüka agiba mapang tayongzüka o tatsüka jembidang taküm MDFA Trophy nung team 14-i shilem agirta angazüka kanga dang pela bilema liasü, team 14-i shilem agiba mapang nung team shia nungi Dr.T.Ao kaka adoktettsü mangdang yur asayadaktünerta asayartem ajungmesoa ashi.

Advisor Imkongisa Mokokchung nung football asaya ajungkettsü mangdang tulu yur MDFA Trophy küm aika timtem jenti arema ayongzüka akar, anungji iba ama tournament nung sorkar nungia teyari agitsüla, iba ama tournament nung sorkari teyari magütsüra tangar menepa mayongzüktettsü, iba ama mapa nung yaritsü asoshi state sorkar dak tashi peria lir, aji asünung sorkari iba ama mapa tajung ya nungita yaritsüla, ta ashi.

Kasa sentong nung District Administration tenung nung Additional Deputy Commissioner Mokokchung Chumlamo Humtsoe-ia shilem agia jembiba den MDFA Tir Meyisangeri tepela o jembia liasü.

# Paris Olympics atema shooter tem shimtsü asoshi May ita trials 4 agitsü

**Yimpoksüi/November 3, 2023 (Agencies):** 2024 Paris Olympic Games atema contingent shimtsü asoshi National Rifle Association of India (NRAI)-i ayongzüka taruba küm May ita trails pezü agitsü. Federation-i ashiba agi, taoba mapang ama World Cups aser World Championships amala asayamung tulu nung takok ngur alirtem bonus point aika bener trails nung shilem agitsü memelatsü.

Ajisüaka shotgun asaya nung ama Olympic quota ngur aliba shooter tem nem tangar dang nungi talila point kaka agütsütsü.

NRAI technical committee-i, shooting asaya ajak atema taruba anogo ishika tsüngda Olympic selection criteria tembanga yanglutsü imlar.

Parnoki tawa shotgun event atema Olympic Games criteria yangluogo.

October 22 nü sayaba criteria tasenba nung ashiba agi, "quota ngua alir ajak, parnok tetoktepb (World Championships aser Asian Championships) final nung kechi rank nung lidir liang parnok nem point kaka agütsütsü. Olympic Games Selection Trials nung anguba point den iba point ya bendenlokttsütsü."

NRAI secretary Rajiv

Bhatia-i, Olympic selection criteria nung temelenshitem bener arutsü atema technical committee-i tang asadangdar, ta ashi.

"2020 Tokyo Olympics masaya tsüngda padding points aika agüja liasü, aser Tokyo nung oa masaya tsüngda form nung maliba shooter tema shimogo kechiyong parnoki point aika bendener liasü.

"Shooter tem karbo point 5-6 agi timba liasü aser ibayongji onoki kecha mesütet, kechiyong parnok tanga tetokteperem dang nungi point timba liasü. Anungji iba dak sendakba nung koba tajungba asütsü iba dak ajemdaker inyaksangshitsüla ta bilema arudar.

"Iba ken o ya technical committee-i achaayangdar aser parnoki telemtetba agir sangdongtsü. Onoki linük atema quota ngur aliba asayartem nem point kaka dang agütsütsü ta jangja jangja metetdakttsüogo," ta pai ashi.

Source kati ashiba agi, category ajak nung küm ana tsüngda asaya aruba dak ajemdaker shooter tajungtiba pongu trails nung shilem agidakttsütsü.

"Quota ngur alirtem aser küm ana tsüngda asaya aruba dak ajemdaker temaba jenjang nung aliba shooter 4 Olympics trails nung shilem agitsü," ta source-i ashi.

# Manipur police commandos-i... (Tapak 1 nungi...)

Manipur Police Commandos-i iba mapa inyakdang tashiyim benshi aser iba ajanga nisung noklang aika pei yimtsüngtem toktsür jena ogo. Commando temisa Lamyamba Kipgen ta ser civilian ka khaset, ta parnoki ashi.

Manipur nung Kuki-Zomi-Hmar MLA temia Manipur Police Commandos agientsü atema sangdong ka agütsüogo.

November 1, 2023 nü Manipur Police commandos-i Sinam Kuki yimtsüng amak aser kiojen/garitem raksatsü, ta MLA temi ashi.

Moreh nung search operation

agidang Manipur police-i mi senoktsü, injang mashii khatok, osettsüset aser garitem auya aser tetsür o tanurtem dena civilian dak tashiyim inyakba ajanga parnok aremi jena ao, ta MLA temisa metetdakttsü.

Manipur commandos-isa tetsür aika dak teka sangshi aser tim masüba inyak aser parnok mozü kidang anioka anepaludar" at parnokisa ashi.

Kuki-Zomi-Hmar MLA temisa MHA dang Moreh nung neutral forces mapa lemozütsütsü aser tashiyim amshiba Manipur police merenshitsü temepishiba agütsüogo.

# SMI-i ayongba 5 buba gari asemtepb 'Throttle Thrust' sentong tenzüko

**Mokokchung, Yimpoksüi/ November 3 (TYO):** Ungma village council chairman, R. Nungshilepden Jamir-i Nov 3 nü gari asemtepb 5 buba 'Throttle Thrust' sentong meraketa tenzüksüogo.

Iba sentong ya Ungma yimlushi nung Spearhead Motorsport Initiative, Mokokchung-i ayongzüka akar. Ibai SMI pur asoshi kümshi ayongba sentong ka lir, aji süaka, Covid-19 ajanga alima tensa tia mesüngjemtetba agi taoba küm 3 mayongteti arur taküm asentenshia akar. Taküm iba sentong ya SMI züngsem asür Imtimayang Jamir nem akümtsübu agüja aser pa biletmeta ayonger.

Iba asemtepb ya super-sprint aser hill climb yimya nung agir. Takümji asemtepb telemsa asem - Below 1300 CC, SUV aser Open Category ta alitsü. Asemtepb telemsa balala nung Mokokchung



Ungma village council chairman, R. Nungshilepden Jamir-i 5 buba 'Throttle Thrust' sentong tenzüksüdag tangokba noksa nung angur.

densema Dimapur, Kohima Iba asemtepb sentong ya aser Wokha district-tem nungi Nov 4 nü tembangtsü aser parnok 32-i shilem agidar. senpet agütsüba sentong nung Takoker nem senpet ajak senteper (pool prize) sen 3.5 lakh agi senpettsütsü.

**BILEMDANGANG**  
"Na kong menügdaker idakji mapang tintok."